


TEZAUUR LITURGIC
16 MARTIE

ACATISTUL
SF. CUVIOASE
EUTROPIA
DE LA
CHERSON



MOSCOVA, 2000



Акафист преподобной ЕВТРОПИИ ХЕРСОНСКОЙ

Кондак 1

Избранней и предивней угоднице Христовой, скорой помощнице и молитвеннице нашей, преподобней матери Евтропии похвальная воспеваем пения. Ты же, предстательнице наша, яко имущая велие дерзновение ко Господу, моли избавитися нам от бед и скорбей, зовущим: Радуйся, преподобная мати Евтропие, о душах наших усердная молитвеннице.

Икос 1

Ангельски на земли поживши, постническим житием Христу угодила еси, преподобная мати, и, по скончании земнаго жительства, радости небесныя причаститися сподобилася еси. Темже с горних высот призри на ны, тако ты величающая:

Радуйся, голубице непорочная.

Радуйся, девственнице чистая.

Радуйся, иночествующим утешение.

Радуйся, к Небесным обителем
путеводительнице.

Радуйся, притекающих к тебе заступнице.

Радуйся, теплая за ны ходатаице.

Радуйся, преподобная мати Евтропие, о душах
наших усердная молитвеннице.

Кондак 2

Видя Господь ангелоподобное житие твое, мати
Евтропие, и яко имаши святое имя Его
прославити добротельми: воздержанием,
молитвою, милостынею, чистотою, любовью же
и смиренномудрием, от юности твоея призва ты
пети Ему: Аллилуиа.

Икос 2

Разум Небесный тебе даровася, преподобная,
сего ради, Христови всю себе вручивши,
непрестанно помышляла еси о Небесных в
богоспасаемей обители Алешковстей. Мы же,
ведуще о сем, приносим ти похвалы сия:

Радуйся, благочестию и молитве измлада
наученная.

Радуйся, чтению Божественных Писаний
навыкшая.

Радуйся, жития святых и поучения их возлюбившая.

Радуйся, от юности твоя страх Божий имевшая.

Радуйся, во всем житии твоем о горнем помышлявшая.

Радуйся, сим путь спасения нам показавшая.

Радуйся, преподобная мати Евтропие, о душах наших усердная молитвеннице.

Кондак 3

Сила Вышняго от юности твоя воистину осеняше тя, святая Евтропие, храняше бо тя и возбуждаше на молитву, пощение и милосердие. Темже вся сия исполнивши, Небесному Царю и Владыце всех угодила еси, и ныне, пресветлым Небесным венцем украсившись, воспеваеши со Ангелы песнь: Аллилуиа.

Икос 3

Имеяше желание благое мир оставити и Единому Господеву поработати, стопы твоя во обитель Алешковскую направила еси, да возможеши безпреткновенно подвигам иноческим предатися и житию святых

поревновати. Мы же, взирая на сие, прославляем Бога, укрепляющего верныя Своя, приносяще тебе таковая:

Радуйся, точию Господу угодити восхотевшая.

Радуйся, со умилением Ему молившаяся.

Радуйся, Бога яко Отца измлада возлюбившая.

Радуйся, в напастех на Того Единого уповавшая.

Радуйся, чистоты душевныя и телесныя хранительнице.

Радуйся, дев благочестивых украшение.

Радуйся, преподобная мати Евтропие, о душах наших усердная молитвеннице.

Кондак 4

Бури страстей желаючи избежати, житие девственное возлюбила еси, преподобная, и, ум и сердце отрешивши от всего земнаго и привременнаго, к Горнему Иерусалиму устремилася еси, да возможеша непрестанно взывати Христу: Аллилуиа.

Икос 4

Слышавше, преподобная мати, яже Апостол рече: «Непосягшая печется о Господних, како

угодити Господеви», - сему поревновала еси. Темже, введуще богоугодное житие твое и теплую любовь к Богу, вопием ти сицевая:

Радуйся, приметатися во дворех Господних возлюбившая.

Радуйся, путь иноческаго жития избравшая.

Радуйся, Христу уневещенная.

Радуйся, свеще негасимая, к Богу в молитвах горящая.

Радуйся, благодатию Божию обогащенная.

Радуйся, едину надежду токмо на Господа полагавшая.

Радуйся, преподобная мати Евтропие, о душах наших усердная молитвеннице.

Кондак 5

Боготечная звезда, ко истине Христовой путеводящая, явилася еси, блаженная мати, егда бурю лютых гонений на Церковь воздвиже враг рода человеческого. Ты же всем приходящим к тебе молитвенную помощь подавала еси, увещавающи верность Христу хранить и за вся Бога благодарити, с любовью поюще Ему: Аллилуиа.

Икос 5

Видевше ближнии и дальнии благочестие твое, притекаху к тебе в болезнях и скорбех, бедах и нуждах, яко к добрей наставнице; ты же, мати Евтропие, утешающи всех, назидала еси наипаче заповеди Господни соблюдать и любовь ко всем в сердцах своих имети. Мы же, прославляюще мудрость и смирение твое, умиленным сердцем воспеваем ти таковая:

Радуйся, праведнице, от Бога нам дарованная.

Радуйся, к Немуже велие дерзновение стяжавшая.

Радуйся, заблуждений и недоумений наших добрая вразумительнице.

Радуйся, недугов всяческих и скорбех наших прогонительнице.

Радуйся, по морю житейскому нас путевождящая.

Радуйся, путь смирения во спасение нам указующая.

Радуйся, преподобная мати Евтропие, о душах наших усердная молитвеннице.

Кондак 6

Проповедуют о богоугодном житии твоём, блаженная мати, добродетели твоя: благочестие, смиренномудрие, милосердие и истинная любовь ко всем, ты бо, по слову Апостола: «Всяк же подвижайся от всех воздержитя», в посте и воздержании неослабно пожила еси, дары Духа Святаго в сердце своем стяжавая и выну Господеви поя: Аллилуиа.

Икос 6

Возсия Божественная благодать в подвизах жития твоего, мати Евтропие, еюже укрепленная, по разорении обители Алешковския в весь Киндийскую преселившись, душу свою молитвою во храме Рождества Пресвятыя Богородицы питала еси. Мы же, богоугодное житие твое ведуще, поем тебе сицевая:

Радуйся, Крест Христов аки знамение веры приимшая.

Радуйся, скорби и лишения со смирением понесшая.

Радуйся, во храме, аки при ногу Христову, приметатися изволившая.

Радуйся, яко не посрами тя Господь во уповании на Него.

Радуйся, покаянию и заповедем Божиим нас научающая.

Радуйся, прославляти и благодарити Господа за вся нас вразумляющая.

Радуйся, преподобная мати Евтропие, о душах наших усердная молитвеннице.

Кондак 7

Хотяй Человеколюбец Господь всем спастися и в разум истины приити, яви тебе, преподобная Евтропие, подвижницу веры и благочестия в земли Херсонстей, да известно уведевшии о святем житии твоём прославят Бога, дивнаго во святых Своих, присно вопиюще Ему: Аллилуиа.

Икос 7

Новую и дивную дарова Господь людем херсонским молитвенницу и целительницу недугов душевных и телесных, подвизая всех угодниче Своей, блаженней старице Евтропии, воспевати сиче:

Радуйся, спасения нашего к Богу ходатаице.

Радуйся, о прощении грехов наших Судии
Праведнаго умиловительнице.

Радуйся, благое иго Христово на ся взявшая.

Радуйся, бремя Его с радостию понесшая.

Радуйся, к ближним милости и сострадания
преисполненная.

Радуйся, смиренною молитвою вся
побеждавшая.

Радуйся, преподобная мати Евтропие, о душах
наших усердная молитвеннице.

Кондак 8

Странно бысть неверующим слышати, како
возмогла еси невидимое зрети яко видимое и
грядущая провидети яко настоящая, не ведяху
бо силы Божия, в немощи человечестей
совершаемая, ниже пети Создателю всяческих:
Аллилуиа.

Икос 8

Вся земныя утехи, яко скорогибнущия, во уметы
вменила еси, преподобная мати Евтропие, ум и
сердце твое в горняя вперивши. Сего ради яви
тя Господь людем херсонским, посреде бурь
житейских миром их ограждающую и кроткими

словесы твоими на путь спасительный, ведущий к Царствию Небесному, наставляющую. Мы же, прославляя Бога, тако ты укрепившаго, приносим ти благохваления таковая:

Радуйся, во вся дни приходящим к тебе духовную помощь подававшая.

Радуйся, бодрствуящи духом, вся нощи в молитве проводившая.

Радуйся, псаломски утро в молениих предварявшая.

Радуйся, вериги тяжкия на теле своем нося, плоть свою всячески смирявшая.

Радуйся, постом, молитвою и благодатию Божиею дух твой подкреплявшая.

Радуйся, в женстем естестве мужескую крепость имевшая.

Радуйся, преподобная мати Евтропие, о душах наших усердная молитвеннице.

Кондак 9

Во всяких напастех и скорбех утешительницею благодатною, страждущих была еси, мати Евтропие, тугу сердечную словесы и молитвами твоими прогоняя и во уповании на помощь

Вышняго тех укрепляя, научая пети Ему:
Аллилуиа.

Икос 9

Ветии многовещанныя не возмогут по
достоянию восхвалити ангельское твое житие и
премногия добродетели, преподобная мати,
имиже просвещаеши вся и наставляеши на путь
спасения. Того ради, во свете святых ныне
пребывающи, поминай творящия память твою
песньми сицевыми:

Радуйся, сущим в бедах скорая помощнице.

Радуйся, обидимых крепкая защитнице.

Радуйся, обидящих строгая наказательнице.

Радуйся, сомнящихся кроткая вразумительнице.

Радуйся, душ смятенных умиротворительнице
тихая.

Радуйся, недоумеющим советнице мудрая.

Радуйся, преподобная мати Евтропие, о душах
наших усердная молитвеннице.

Кондак 10

Спасити хотя многия люди от страданий
телесных и недугов душевных, вся нощи без сна

в молитве коленопреклоненно пред Почаевскою иконою Божия Матери проводила еси, праведнице Божия, помощи у Царицы Небесныя прося и поющи Сыну Ея ангельскую песнь: Аллилуиа.

Икос 10

Стена еси непоколебима, мати Евтропие, всем в нуждах и скорбех к тебе прибегающим; темже, припадающе, молимся: услыши ныне и нас, скорбьми, болезнями и многими печальми обдержимых, и потщися на помощь к нам, умиловляющи благоутробнаго Господа о всех к тебе вопиющих:

Радуйся, усердная о нас, грешных, к Богу предстательнице.

Радуйся, всех прибегающих к тебе благая утешительнице.

Радуйся, молитвою твоею спастися нам помогающая.

Радуйся, мысли благия в недоумениях наших на сердце нам полагающая.

Радуйся, враждующих благое примирение.

Радуйся, от брани единокровных охранение.

Радуйся, преподобная мати Евтропие, о душах наших усердная молитвеннице.

Кондак 11

Пение Пресвятей Троице непрестанно возносила еси, преподобная мати, и всем житием твоим подвижница благочестия прозорливая и преизрядная явилася еси; научи и нас, недостойных, како подобает достойно славословити Бога, в Троице покланяемого, Отца и Сына и Святаго Духа, Емуже непрестанно на Небеси воинства Небесная велегласно поют: Аллилуиа.

Икос 11

Светоподательным светильником явилася еси, Евтропие блаженная, всем к тебе приходящим: монашествующим была еси наставница изрядная, благочестно живущим – опора крепкая, во тьме грехов погрязшим, заблуждшим и от пути истинного отклонившимся – вразумление кроткое. Мы же, разумеюще любовь твою велию ко всем, ублажаем тя тако:

Радуйся, преподобных сподвижнице.

Радуйся, праведных сопричастнице.

Радуйся, землю Херсонскую молитвою твоею облагоухавшая.

Радуйся, яко пчела, цвет добродетелей мудро взыскавшая.

Радуйся, дар прозорливости стяжавшая.

Радуйся, милостиво свыше на нас призирающая.

Радуйся, преподобная мати Евтропие, о душах наших усердная молитвеннице.

Кондак 12

Благодати и благих дел исполнена, течение земное совершивши, в мире преставилася еси, преподобная мати, от земных к Небесным, идеже Владыце, веселящися, предстоиши и о нас непрестанно молитвы Ему возносиши, прославляя Его ангельскою песнию: Аллилуиа.

Икос 12

Поюще праведное твое житие, ублажаем тя, преподобная мати Евтропие, и, припадая ко святым и многоцелебным мощем твоим, молимся: буди нам во всем ко благу скорая помощница, зовущим ти таковая:

Радуйся, яко на Небесех ныне пред Господем предстоиши.

Радуйся, яко о людех пред Богом выну предстательствуеши.

Радуйся, земли Херсонския крепкое ограждение.

Радуйся, Святыя Церкви благолепное украшение.

Радуйся, о иночествующих тепле молящаяся.

Радуйся, о благе в миру живущих Бога просящая.

Радуйся, преподобная мати Евтропие, о душах наших усердная молитвеннице.

Кондак 13

О всехвальная угоднице Божия, преподобная мати Евтропие! Приими сие малое моление наше, в похвалу тебе возносимое, и твоим теплым предстательством испроси нам у Царя Славы в немощех исцеление, в добродетелех преспеяние, от врагов видимых и невидимых избавление, от вечныя муки освобождение и Царства Небеснаго наследие, да со Ангелы и всеми святыми присно поем Спасителю нашему: Аллилуиа.



**ПОЛНЫЙ
АКАФИСТНИК
КАНОНИЧЕСКИЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

І

**НУЖЕ
НЕБО**